

高平縣志 卷之十

兵制 武事

國家威德覃敷戎兵整飭節鎮分防星羅密布表裏山河
允矣苞桑鞏固潞澤步兵稱天下最高平固昔時用武
之地也五材不可廢一寧以承平無事詰戎之政遂可
不講蓋自周禮大司馬制軍蒐苗獮狩四時簡閱有備
無患歷代罔不兢兢慎之况邑附上黨漢唐以來爭奪
靡常勝負得失中原所繫往事可稽不容不書也為志
兵制暨武事

兵制

高平縣志

卷之十

兵制

一

太原鎮標澤州營轄高平縣外委千總一員駐劄本城存
城兵九名防守分管汛地六處兵十八名共二十七名

內戰糧一分

南路 南關廂 兵三

南陳舖 兵三

喬村驛 兵三

北路 寺莊鎮 兵三

長平驛 兵三

鴉兒溝 兵三

外委歲支餉銀共五十八兩三錢二分戰兵每月領
餉銀一兩七錢五分守兵每名月領餉銀一兩二
錢五分遇春夏二季月領米三倉斗
扣銀三錢秋冬二季照前支領

演武廳前在東關以河溢毀沒萬歷六年知縣劉一相朔

建於舊址之西歲久傾圮乾隆三十八年知縣傅德宜

重脩有記附後

重修演武廳記

王者耀德不觀兵哉干戈櫜弓矢求懿德而肆時身
治道隆焉今

天子重熙累洽文教覃敷薄海內外罔不畏威懷德固非
陳師鞠旅威武奮揚時也然兵可百年不用不可一
日不脩古者蒐苗獮狩簡軍實於四時訓迪有方習
練有素進退擊刺步伐止齊之嚴蓋不俟三令五申
於臨事時矣長平夙稱用武地米山積粟光狼屯兵
載在典籍軍旅之事有脩無患是不可弛而不習也
縣治東北舊有演武廳五楹建自明季歲久漸頽辛

高平縣志

卷之十

兵制

二

卯春余奉

命宰茲土初下車未遑營葺癸巳季夏案牘稍清值公項
餘羨足資修理爰鳩工庀材易五楹爲三旣堅且飾
開騎射道補牙章臺不匝月厥工告竣藉是以爲訓
迪簡練之地庶幾規模旣正武備聿修有勇知方兵
與將習而折衝禦侮之才行亦表見於尙德之世矣
是爲記

舊志載明洪武二年縣丞潘珪造設軍器嘉靖十四
年知縣劉鳳池增修貯庫天啟三年知縣喬淳修補
內庫軍器添造刀斧鎗銃等件有差崇禎四年知縣

魯光國設城上漆木火砲以防不虞今一切統於營制

武事

周赧王三十五年秦白起伐趙取代光狼城

詳開
監

五十五年秦白起射殺趙括

詳開
監

晉永嘉三年王曠等與劉聰遇戰於長平間曠兵大敗聰

趙皆死

詳開
監

隋大業十年十一月己酉賊帥司馬長安破長平郡

王君廓并州石艾人少亡命為群盜聚徒千人轉掠長

平李密召之遂投于密

高平縣志

卷之十

武事

三

唐會昌中王師伐劉稹武宗以盧鈞寬厚得衆詔節度昭

義會稹死勅乘驛進檢校兵部尚書專領昭義鈞及潞

石雄兵已入而稹將白惟信率餘卒三千保潞城未下

雄名之使往十餘輩皆死鈞次高平惟信乃獻款

周廣德時劉崇南侵周祖威命韓通赴河中王彥超出晉

州逆擊之敗于高平以通為太原北面行營部署

顯德元年世宗戰劉旻於高原敗之追及於高平又敗

之

詳開
監

范質從征高平還加司徒弘文館大學士

顯德初李崇矩補供奉官從征高平以功轉供奉庫副

使

劉崇南寇周世宗命王彥超領兵趣晉州路東向邀擊從戰高平彥超自陰地開與符彥卿會兵圍汾州州將董希顏以城降

劉崇入寇遣馬軍樊愛能步軍何徽赴澤州令向拱監護之世宗親征拱以精騎居陣中高平之捷以功兼義成軍節度河東行營前軍都監

韓重贊從世宗戰高平以功遷鐵騎指揮使

石守信從世宗征晉陽遇敵高平力戰遷親衛左第一軍都校

高平縣志

卷之十

武事

四

尹崇珂世宗時補東西都知從戰高平有勞績遷本州副點檢

曹翰世宗時補供奉官從征高平忝豫謀畫尋遷樞密宋初從征澤潞還改濟州刺史

李穀從世宗征太原遇賊于高平匿山谷中信宿而去嘗居潤顯德中從征高平以功遷客省使知青州宋太祖立加檢校太尉及征潞澤命赴澶州巡檢

蔡審廷顯德初從戰高平有功遷軍使

王晉世宗時補東頭供奉官從戰高平

世宗戰高平戮不用命者因求饒勇士通書舍人李延

傑以荆罕儒聞

范廷召世宗時入補衛士從征高平戰疲力遷殿前都
揮使

劉崇入寇世宗親征至高平不利諸將多引退馬仁瑀
謂衆曰主辱臣死安用我輩乃控弦躍馬挺身出戰射
賊斃者數十人士氣益振大軍乘之崇遂敗

世宗北征大將高懷德董遵誨之舅也表遵誨從行
次高平與晉人遇將接戰晉兵未成列懷德命遵誨先
出奇兵擊之晉人潰大軍繼進遂敗之

宋建隆元年石守信敗李筠于長平斬首三千級

高平縣志

卷之十

武事

五

靖康元年二月金師至高平知澤州高世田往犒之乃
去

金師圍太原守將折可求劉光世軍皆敗平陽府義兵
亦叛導金人入南北關取隆德府遂攻高平宰相咎尚
書右丞京城四望守禦使李綱盡遣城下兵追敵上倉
皇無措急徵諸將還諸將已追及金人于邢趙間遽得
還師之命無不扼腕比綱力爭復追而將士解體矣

元光元年六月上黨公完顏開復澤州高平縣

元至正十八年五月關保與賊戰于高平敗之

明崇禎五年游擊猛如虎擊邢紅狼于高平解其圍

國朝順治元年九月餘 賊劫攻高平署縣周再勳拒守

按古者以田賦出 兵三時務農一時講武于城腹心

之寄不必在行陣 也自後世兵與民分惟唐之府兵

近古高平在唐傳 有五府諒其時習兵者衆矣

國家承平日久規制整 飭兵民相安而又每縣添設民壯

高平近定三十名 每名歲支工食 銀七兩二錢 朝夕訓練材壯器

利以弭盜安民法 良意美是亦軍政之一助也附書

於此兵藏不用詎 遜兩階于羽歟